

淮郡文獻志

第七卷
行實四



漢書門	八九七	函架類
	六四	
	一八	

漢書	八九七	函架類
	六四	
	一八	

內閣文庫		
番號	漢	8974
冊數	18	(5)
函號	287	143



Kodak Gray Scale

A 1 2 3 4 5 6 M 8 9 10 11 12 13 14 15 B 17 18 19



© Kodak, 2007 TM: Kodak



淮郡文獻志卷第七

皇明

駙馬都尉兼淮安衛指揮使黃公琛

黃公琛舊名寶本武昌人歲壬寅以帳前叅隨

擢兵馬副指揮




其謹厚命尚皇兄蒙城王女甲辰為聚

寶門店官乙巳授管軍千戶尋改龍江驛守禦

千戶累從王師征討及鎮守畿甸多著勞績洪

武元年封皇姪女為慶陽公主授寶駙馬都

尉既而兼明州衛指揮使未幾改淮安衛指揮



使三年改名琛後禮部奏稽古公主之制皇
姪女宜改封郡主夫止稱所授官琛當上駙馬
都尉誥

上念皇姪女惟此一人不忍遽加降奪仍稱
公主歲給祿米五百石琛亦稱駙馬止食本官
之俸十四年擢中都正留守授驃騎將軍至
是卒年四十九訃聞
上為之悼惜賜墓鳳陽白塔之原見

皇明實錄今子孫一支留於淮名其坊曰駙馬
卷

刑部尚書楊公靖

楊公靖字仲寧淮安山陽人洪武十八年乙丑
舉進士為庶吉士試事吏科十九年丙寅擢戶
部試右侍郎實授左侍郎在職公勤
詔有司復其家因進士監生犯罪不悛
御製大誥指示而激勸之曰如通政使韓宣左
通政茹瑄戶部侍郎楊靖工部侍郎秦逵皆同
時由進士監生而登顯職各能率職以稱朕心
其操也恪遵先聖先賢之道故能伸於群職之
上其犯罪不悛者終至於殺身二十三年庚午

五月陞刑部尚書二十四年辛未命以尚書兼太子賓客給兼官俸公資性明敏有識善敷答理刑平恕

上數獎勵之尋以事免命出使安南還改左

都御史郡志云以布衣抵安南先是國王感異

威德輸其酋輸粟上驚異至是鄉人坐事繫獄家人擊登

聞鼓訴狀靖為改狀草御史劾之

上念其才不之問御史論不已迺賜盡於家

父懋兄安奉

上命歸葬於淮年三十八公平生自負忠赤束

書入京不十年位崇台輔以布衣奉使海外蠻

貊敬信則其人可知矣其生也死也莫非天也

而何預於人哉作誌者隱其詞諱其姓名亦過

矣

墳謹按

大明實錄南畿通志新舊郡志墓誌參互采掇

立此傳不敢妄增一語示傳信也追憶四十

年前嘗為公收養遺孤修葺遺塚奉藏遺像

而天奪其孤竟不能懋遺近復白諸撫鎮募

諸鄉人建昭卹院於墓左召僧住種以奉香

火廢我公之神其不死矣乎

而天孝子岑公義

岑公義邳州人幼以孝行聞父母在朝夕問安必拜跪進飲食湯藥必親調母疾禱神願減已年以增母壽母旨公朝夕飮之雙目復明及卒葬岨山下公跣足負土壘墳廬墓三年洪武間有司上其事旌表門閭見州志

鴻臚寺少卿郇公旃

郇公旃沭陽人洪武丁丑進士永樂間任給事中性警敏有吏才機事慎密受知

太宗文皇帝察官邪釐弊政言無不聽寵遇之隆冠於一時陞鴻臚寺少卿卒遣官諭祭蓋特恩云見縣志

廣寧侯謚忠武劉公江

劉公江宿遷人永樂中為中軍都督府左都督總兵鎮遼東歲己亥倭賊二千餘以數十海艦直逼望海埭下登岬魚貫行一賊貌甚醜惡揮兵率眾如入無人之境瞭者飛報江令犒師秣馬畧不為意以都指揮徐劄伏兵於山下百戶姜隆率壯士潛燒賊船截其歸路乃與之約曰

旗舉伏兵砲鳴奮擊不用命者以軍灋從事既而賊至塌下江披髮舉旗鳴砲伏兵盡起繼以兩翼而進賊衆大敗死者橫仆草莽餘衆奔櫻桃園空堡內我師追逼環舉者皆奮勇請入堡勦殺江不許特開西壁以縱之仍分兩翼夾擊生擒者數百斬首千餘間有潛脫而走艚者又爲隆等所縛岍無一人得脫凱還之際將士請曰明公見敵意思安閑惟飽士馬及臨陣作真武披髮狀追賊入堡不殺而縱之何也江曰窮寇遠來必饑且勞我以逸待勞以飽待饑固

敵之道賊始魚貫而來蛇陣故作此以鎮服之雖愚士卒之耳目亦可以壯士卒之氣賊旣入堡有死而已我師臨之彼必致死未必無傷我故縱其生路即圍師必闕之意此固兵灋顧諸君未察耳事

聞進 封廣寧伯明年卒進 封廣寧侯謚忠

武子孫世襲先是倭寇出沒海上焚民居掠財貨殺虜生口自遼東山東南抵閩廣濱海無歲不被其害官軍卒不能制往往有至失機死罪者至是寇害屏息傍海千餘里民共獲安以至

於今見保齋餘錄

給事中丁公珏

丁公珏淮安山陽人居淮北鎮授徒鄉校有澄
清天下之志

文廟渡淮獻十二策

宣廟時以人材就徵授監察御史奉命抄廣

右豪族公潛往廉其實一舉撲滅之奸臣紀綱

竊權亂政公率諸御史廷劾之奉

旨處斬

朝廷肅然敬憚改給事中以言事謫戍雲南所

聞諸葛老云然今語

東按察司僉事官

宮公安山陽縣人父早喪母改適北商攜之去

公稍長讀書遊郡庠宣德間貢入京陸行避雨

店舍店媪問及鄉貫知其為淮人因問汝知蘇

城南門宮家否及復詰問母子互相認抱持慟

哭不恣舍時母子相別踰四十年母已生二三

子立家業公發相依無以爲計近之不能致養

遠之不能迎養恨踰終天

入選授温州府推官陞廣東按察司僉事以清
慎勤敏稱恒自謂天地間罪人因致其事歸囊
索蕭然家徒壁立杜門却掃不問人間事貧無
生業恒養豬資薪水有司歲取其一供祀翌日
巡撫都御史王公竑過其家扣所以為生公以
實告王公深加嘆異書問省司有司曰不知其
為僉事家曰不知為僉事僉事志亦重矣每有
所遺公亦不受吁若公者可謂卓行矣頃自幼
聞之長老云然惜乎郡志不書

興化府通志

丁公恭字時亨號吉齋海州人性警敏過人言
笑不苟工楷書以正統辛酉舉人試吏部第一
授戶部主事立朝以剛正自持未嘗與人款洽
嘗論劾同事御史某御史既黜公亦謫判興化
清慎愛民賑歲饑弭虎患卓有善政莆民到今
思之卒於官學士林文為之誌見州志
浙江布政司右叅政劉公安
劉公安字志康從高祖母姓乃姓高其先泗州
人六世祖仕宋為宿州安撫使
聖朝混一之初祖再八徙居山陽因家焉父楚

善公幼警敏過人父曰他日顯劉氏者必此子也九歲喪父母既長質貌魁偉舉止端重嘗撫松楸嘆曰有親而不得養與夫有子而不能顯揚者同一不孝因肆力於學入郡庠爲弟子員累舉不第貢入太學補上舍生宣德癸丑擢知南宮縣慎於操守勤於撫字教民以樹藝之灋聯士子以進修之方置義倉義塚貧者有養死者有歸北方賢有司莫能或之先也甲寅夏境內旱蝗率吏民禱三日乃雨蝗亦頓絕是歲鄰邑皆饑惟南宮大熟明年鄰邑復蝗獸不入境

又大熟民歌之曰侯宰南宮民和政通蝗不入境今之魯恭頌聲播諸遠邇時有賊張晉祥等號白蓮會河北騷動

朝廷索之急公捕其黨仲伍等檢其家得簿書錄妖者姓名吏欲送府窮治之曰不可亟火之全活者幾萬人邑南有李陽水廟碑高丈餘歲久祠頽碑且仆公一日率僚屬祈雨至祠下見碑石甚巨非數百人弗能起告於神曰神如有靈碑自立安當新其祠翌日雷雨大作四野霑足碑亦起立公以銀觚奠神就付諸廟中因具

其事上

聞且請新其祠

詔許之召工雜草萊增基址興版築掘地獲錢六十萬緡遂爲修葺之需期月而廟成正統辛酉春公慨科目久乏人乃割俸資市巨木送學宮語諸生曰吾以科目望汝輩不負吾所望者當以此木表其坊是秋白圭領鄉薦舉進士歷官學士太子太保兵部尚書遂以所市木立鄉貢進士坊又出俸金厚贈之自是人才輩出科目有人九載秩滿民攀號寒道車不得行既

又詣闕借寇不果留尋被薦陞知杭州府府衝繁難治公處之易易如庖丁解牛未幾陞浙江布政司右叅政二年病卒年六十有二公有士行有吏才英敏果斷寬裕有容其在南宮公與圭有父師造就之恩在浙藩圭與公有僚友交承之誼處之各盡其道而報之不失其情可

以爲難矣白圭撰行狀

太子太保戶部尚書封沐陽伯謚榮襄金公濂金公濂字宗翰其先北平灤縣人曾祖誠洪武初徙淮之山陽公博聞彊記志欲有爲永樂間

文獻志 卷之六
登進士拜監察御史激揚繩糾有能舉巡按廣
東江右正己正物豪民史慶真猖獗兩浙間人
莫能制衆推公往捕獲寘於灋居父憂
詔起爲陝西按察司副使虜酋朶兒只伯寇邊
不靖公督運軍餉未幾陞僉都御史提督西夏
兵馬素閑孫吳灋與諸將論兵指授方略某何
如取勝某何如取敗凡受成算者往無不克尋
陞副都御史仍掌兵柄西虜不敢南犯逾年召
還陞刑部尚書推讞疑獄發無不中外雖嚴而
內則平恕閩人鄧茂七聚衆稱亂

親廷遣將征討 命公輔行軍中事悉聽處分
惟以安輯撫順爲心誅其不用命者弗迂弗奔
全師而還過淮聞母喪匍匐號就道陞 太
子太保兼戶部尚書用言者改工部尋復戶部
上章懇辭兼俸不許進光祿大夫多事以來邊
儲匱乏籌畫出納不敢徇人人或有所不便則
曰今邊塵瀕洞兵非食不飽馬非牧不壯爲國
任大臣之責苟可以安民生拯時艱者寧受謗
不辭羣議頓息其公忠愛國類此公襟量弘濶
權度精明博識高才勤於問學尤喜汲引士類

人有一善必獎譽之平居威重凝肅而接物愈
恭晚年有痰疾一夕夢寐間彷彿見郎吏持簿
書答以有疾不行閱三日而卒年六十三公歷
仕五朝精忠偉望卓然為一代名臣卒之日朝
野士大夫及將校胥史兵民商賈莫不哀慟訃
聞

上為之震悼遣官

諭祭

詔有司造葬及議平鄧茂七功追封沐陽伯

太子太保兼戶部尚書追

封沐陽伯謚榮襄

淮陽金公先公之同年友也自初仕為監察御
史晚歲同以宮保兼六卿相得甚歡先公每稱
公為一代偉人公之薨少保兼太子太傅芳
洲陳先生為撰神道碑其家久未刻蓋有所忌
也至今三十有八年矣予托淮安太守徐侯用
和求諸其孫得錄本於故篋字多脫謬侯錄示
喬新且礮石置隧道屬喬新校定其文將刻之
以圖永久喬新乃取東魯許先生所述公行狀
校其訛缺竊惟芳洲與公仕同時碑文宜詳實

然叙公平閩寇之功甚畧而自戶部左轉工部
又似有所諱者喬新公通家子也敢述耳目所
及者以補碑文之缺初公受命南征兵抵浙
江遣都督劉德新以偏師繇杉關進自與寧陽
侯陳公帥大兵繇分水關進刻期會於延平及
兵至建寧賊首鄧茂七已敗死餘黨立其姪為
主勢益熾公揭榜招諭降者日數千惟兇徒負
固不服公乃進兵沙縣剪貢川芟掛口夷陳山
而尤溪將樂諸邑以次破降遂分遣偏裨解汀
漳之圍不數月八閩肅清其策畫皆出於公諸

將受成筭而已及在戶部南北用兵儲峙不足
公經度擴拾未嘗乏絕浙東大姓有輸歲賦綿
絹至京者適有

詔蠲逋賦乃匿其半而以其半賄權貴囑公以
赦蠲之公言此乃已徵在官者力持不可權貴
怒喉臺諫劾公文致其臯請下廷尉
景皇帝察其誣不許都御史王文素與公有隙
抗言詆公以為不可宥

景皇帝不得已乃落公太子太保改工部尚
書時先公為吏部尚書上言北虜未臣南夷復

關所急者軍儲耳金瀛有經濟才其計度財賦以克邊儲非為私也自古理財之臣多招怨謗如唐之韓滉宋之趙開是已惟

陛下察之書上

景皇帝嘉納還公戶部尋復太子太保此二事皆喬新所睹記者不敢誣也嗟夫諛說殄行古有之矣何必諱哉謹識於碑陰使來者有考焉見椒丘集

南京戶部尚書沈公翼

沈公翼字克敬其先自東魯徙居淮安占籍山

陽公坐稟穎異日誦千萬言弱冠入郡庠嘗手編三場問答後學皆宗焉宣德己酉以詩經領鄉薦明年登進士第正統初擢南京刑部主事改戶部丁母憂起復仍拜戶部公長於計畫凡所部倉廩之盈虛戶口之登耗山川之險易賦稅之多寡無不周知時雲南土官思任發梗化地方弗靖

朝廷命靖遠伯王驥率師討之以公為轉輸使適連歲荒歉糧餉匱乏公區處有方供饋弗絕乙丑北虜來庭

勅徙置東昌平山等處撫綏得所丁卯勘問廬
州民爭田各得分願又奏減額外稅五萬餘石
人皆悅服己巳陞郎中當虜寇犯順京師戒嚴
芻糧少積

朝廷以公久在戶部計慮精詳超拜本部右侍
郎自慶遭際殫心策畫軍儲以克尋奉

勅協同總兵平江侯陳豫疏築臨清等處城隍
訓練士卒防遏姦宄仍兼督漕接濟京儲癸巳
陞南京戶部尚書適山東饑民流徙奉

勅暫留賑濟民用救寧比到官持公道祛宿弊

部政一新倉廩空虛多方儲峙未幾有歸志天
順元年

勅令致仕抵家日與宗黨父老賞會燕游不知
老之至而力之疲也尋病卒年六十有六公性
鯁介不阿雖有善者稍不義即面斥之不善者
能改過即稱許不置故人人敬憚而悅服焉工
部侍郎莆田翁世資撰行狀子珪

珪字廷實天順丁丑進士歷陞吏科都給事中
在諫垣十餘年多所建白舊制四品以上官由
吏部推陞忽傳

古四品以上官如大臣例

朝廷擢用吏部不敢執奏公慮中官專擅曰是吾責也上疏極論如是為守成灋如是為亂舊章言甚剴切竟得俞允時有大臣某謀陞冢宰公力阻之不能奪既得吏部首推公陞太僕寺少卿時人為之語曰官高五品權減十分卒於官見郡志

孝子楊公旻

楊孝子淮安人名旻字克彰然鄉族之長老交游之士夫未嘗名之字之雖田夫市卒慮見

之曰楊孝子故場孝子之名達諸京師聞諸四遠也孝子性慈自幼事父母孝事兄極恭父蚤世而哀毀甚母陸慰解之即強顏以悅母心而哀不衰事母之道備至家無厚資而甘腴賙饋必如母志母酷愛其孫嘗牽率抱弄於前枚指之曰某可承家某可事生業某當作官以顯門閭母聞之大悅門戶有憂戚不即告母嘗愉色婉容在左右以安母心暇則坐塾中誨諸子及鄉鄰之秀彥必以躬行孝弟為先才質輕俊善文章者少忽於孝弟則懇

懇諭之弗改則厲聲斥絕之母嘗病醫禱無所
不至晝夜未嘗安寢飽食母歿哀號頓仆水漿
不入口者數日及葬遂廬於墓側衰絰不解晨
奉櫛類夕奉浣濯如生嘗不少廢哀號之聲聞
者感動鳥爲之翔獸爲之伏左布政使蘭陽丘
陵嘗爲太守兵部尚書王竑時爲都憲鎮淮聞
孝子名廉得其實遂

上聞旌其門則孝子之名益彰大矣自後以其
子理貴封刑科給事中烏紗鶴髮徜徉京邸
以就養老而不衰人以爲孝道之報東海張弼

曰予嘗過淮問揚給事則有知有不知者曰楊
孝子則皆能道其居處指其里巷噫孝子之孝
誠可謂人不間於其父母昆弟之言者乎然夷
考其事親則不過日用之常委曲致力耳初無
剔肝剖股之奇白鳥紫芝之瑞也噫此其所以
爲孝也得曾閔之遺者耶不鼓虛以釣名惟踐
其實也若廬墓之事禮經所不載未可以爲訓
特孝子之誠心可矜也故備錄之見東海翁集
墳按孝者庸行也事生事死一於禮不苟所
謂孝也若舜文曾閔可也吾淮節孝先生之

孝如斯而已矣近代旌舉孝子亟稱事疾事
死鮮及事生何也甚者剗肝剔腦近於誣白
兔紫芝近於誕不可以爲訓我朝

太祖高皇帝因青州府江伯兒割肉療母又殺
子禱神有司以聞亟命捕治謫戍下禮部議
凡割股卧冰不在旌表之例真

聖人之見也

理字貫之舉成化丙戌進士歷官刑科給事中
左給事中都給事中叅駁詳允有所舉奏不務
急刻克 宣寧王府冊封副使不受餽賚同考

禮部時稱得人奉 命覈大同宣府閒地爲豪
勢所侵者請給貧民入其租遷鴻臚寺左少卿
尋改大理寺左寺丞詳讞任平恕勘 陽曲王
府獄事涉疑閤陳

朝廷親親之義 王以下感泣服罪解誣逮者
若干人領武選貼黃事進都察院右副都御史
巡撫河南值歲歉河大決汴城幾墊有議遷改
者民心洶懼公曰遷豈易事乃增築汴隄高厚
禱於河水亦去又禱雨於南陽諸府雨輒至湖
廣饑民流入盧氏永寧將搆亂躬往撫諭發銀

穀賑之有司請俟奏報曰事在不測俟奏報民
且死且盡去為盜如以為罪某當之比
勅至悉如所議全活不可勝紀趙王府獄事
尤重為陳父子慈孝之道王寤事遂寢姦人
以民田詐為閒地投獻諸王府朦朧陳乞一
一疏其情請申禁例汴多貨集官先立市魁為
行頭商賈受制乃一切革去民皆便之禮遇羣
吏詢民疾苦暨政令得失人人得盡陳所見因
采用之尋陞工部右侍郎階通議大夫徵書至
民老唯遮道不忍釋在部愈勤慎修沙河橋旅

妾旁舍軍夫赴役者時致憊勞會苦寒請暫停
役及春從祀南郊歸得疾訃聞
上遣官諭祭命有司營葬年六十公邃經學
為文簡勁言溫氣蘇若無官者尤好汲引後進
有片善獎藉不容口僕吏非大故不加箠撻卒
之日無貴賤踈戚咸悼惜焉

行人張公和

張公和字宗禮山陽人游太學嘗資同業之貧
者後其人補縣有所餽遺不受且勗之曰可善
白持此非所望登成化己丑進士試政工部差

保定抽分時宦臣世據闖隘常盛筵厚餽以啗
分司墮其計者輒為阻撓公至禮以自防盡釐
其弊宦臣傾囊市木以償官時以剗方稱之除
行人卒於官見郡志

青州府知府潘公洪

潘公洪字裕夫宿遷縣人性淳朴不事矯飾由
進士歷陞吏科都給事兩受
勅冊立藩王餽金悉却之時

憲宗皇帝天威嚴重言事者輒得罪公獨受知
眷丙午春天變

詔内外言得失科道畏忌不敢言公已秩滿注
籍休沐疏弊政數十條上之言甚激切

上深加勸獎舊給事滿九年例陞京秩吏部援
例上請時公疏適入

上語中官蕭敬曰是潘給事耶京秩固清赤子
疴痛則目所不及須給事為我卧治乃批曰可
與做知府遂出守福建邵武府勤政愛民禁制
豪猾衛帥楊鐸兇狠貪虐侮弄有司殘害下人
與公不協交通巡按御史呂炯据撫郡事欲以
中公公不為動廉得烟納賄事捕其關節三人

并賊橐甚夥乃疏鐸烟罪狀上聞而公亦為
二人誣奏并逮
詔獄烟鐸竟抵罪公得釋以憂歸事具邵武志
甚詳後改守青州遇新封藩王建造官府具有
欽制而中貴因公圖賄撤毀民居民號泣赴訴
公親為丈量不少假借奪還所侵民地大興中
貴忤未幾復以祖母憂歸服闋吏部推陞太僕
寺少卿適以疾卒今邵武青州俱祀名宦祠見
縣志

太原府知府尹公珍

尹公珍大河衛人剛方不苟合成化間以進士
授工部主事出監徐州洪盤詰漕舟無遺瀆雖
准大兩衛官軍無一毫私貸時官署廢局為大
水漂沒公設瀆重建五百餘間植柳鑿井以便
行人三月而成事竣改刑部主事陞員外郎公
性剛不欲少挫於人時同鄉同僚葉公贄陞嘉
興府知府以舊所用牌梨執事贈之公退食見
之怒罵其子曰此不祥之物彼何以贈汝何以
留未幾公亦陞太原府知府到官為按察使某
所不容訐奏被逮公直按察使曲調官公復任

病卒喪車回妻子貧甚不能為生孔子曰張也
愆焉得剗然則公之剗豈有愆者耶子京
京字兆之舉鄉薦登進士亦為工部主事監寧
陽七十二泉以清謹稱改刑部主事員外郎時
權姦擅政執灑無所撓司寇雖苦其梗然陰重
之陞山西僉事巡冀寧冀北兩道有妖賊聚眾
潛謀據城作亂密擒其首惡餘黨解散孟城礦
賊大闕乃招土人諭以利害不發兵自平陞浙
江按察司副使署司事有奸人秦普美以妖術
惑眾謀不軌止罪其魁首餘釋不問人心自安

毋臨大事善謀能斷類此以暴疾卒於官提
副使前翰林院修撰何瑋誌其墓

雲南布政司右叅議趙公沄

趙公沄字汝遠其先河南衛輝人吳元年占籍
山陽為淮人沄始就外傳即脫去嬰兒態比長
入邑庠為弟子員作文章典雅有奇氣嘗猷坐
一室吟誦不與同儕嬉戲成化辛卯領南畿鄉
薦壬辰會試中乙榜授順天府儒學訓導督教
有灑分嚴而氣辭貧者助以膏油四時饋遺一
介不取啜粥飲水澹如也名動京師閣老東劉

先生嘗對朝紳嘆曰訓導小官清苦如此他日當爲國器太宰東魯尹公少許可書其名黏於堂壁以勵多官歷典山東江西文衡所得皆名士辛丑陞山東長山縣知縣益堅清操催科聽訟不亟不苛本之以誠而行之以恩真如父母保赤子民亦不忍欺不敢緩庶事亦辦累以卓異旌丙午欽取陞南京刑部主事進員外郎乙卯陞郎中在部九年梯媒阻絕都人稱爲趙青天丁巳陞雲南右叅議舊分守官有年例錢吏如例檢奉怒執之白巡按御史罪其人遂革

前弊偶稱疾疏乞骸骨得報即日束裝上道抵家杜門靜養冢徒壁立蕭然如寒士時論多之乙丑蒙

恩詔進階中憲大夫以疾卒年七十三貫初子顧達撰墓誌

河南布政司右叅政史公敏

史公敏字德敏號松泉宋八行太師追封越國公之裔

國初祖谷平遷於淮爲山陽人公天性剛敏博聞彊識中正統戊午應天鄉試乙丑會魁登進

士第除刑部主事陞員外郎天順紀元
英宗皇帝降旨兩瀆司選好官公用薦陞河南
布政司右叅議
賜勅提督撫治許拏問貪暴官吏有妖人草寇
相機調兵辭之日蒙
召入文華殿密諭 賜酒給鈔既之任撫流移
鋤寇盜地方寧謐三載奏最
賜誥命進階朝議大夫先是河南南陽地方歲
饑寇賊蟻聚公翻山刊谷不避險阻草竊山妖
無所伏匿九年考績鎮守副都御史賈銓巡按

御史趙致交奏公撫治有方廉勤幹濟乞陞相
應職仍守地方以慰人望又蒙
賜勅陞右叅政六年公以母壽百有一歲奉養
日短懇疏乞歸從之卒於家公平生秉禮執誼
耻逐時好於聖賢書無所不讀雖古今傳奇亦
無所不知詩文詞曲各臻其妙篆隸真草咸通
於古所著有松泉集傳於世大學士劉翊叙公
為人光明純一詩文高古雄深新意疊出真知
言哉省菴金銑誌其墓

觀復田公潤

田公潤字德潤號觀復安東人神情疏爽性度
溫酥隱居教授環堵蕭然蓋多聞以為富道克
以為貴囂囂如也日課童蒙得錢數十文纔足
薪水雖深居陋巷門多士大夫車暇則鼓琴咏
詩自樂其樂尤長於六壬課言人休咎多依於
忠孝殆嚴君平邵康節之流亞與

杭州府知府陳公讓

陳公讓字德光別號雲軒先世蘇之嘉定人曾
祖大一洪武初戍於淮遂為大河衛人公天分
高器宇英邁剛正不阿疾惡太甚蚤歲遊山陽

縣學由鄉舉登進士拜寶坻令民俗律訟公聽
斷明決羣惡竊視皆遁去卒擒首惡寘之灋一
縣帖然歲凶勸富民出穀賑貸及歲稔果如約
給還咸服其威信陞尹宛平縣都人倚勢包攬
糧差積年殃民牢不可破乃均定賦役公收糧
稅權貴請托一切不行擢知杭州府息囂訟均
賦役抑驕侈散薄俗境內大治時海勢漸內徙
逼海寧城部使者詘羣策莫能治乃請去城一
里許開支河築內堤延袤十里以寬制猛不與
海爭利海果至堤而止上下神其識鑒海寧人

立生祠以祀省城奸人多托奉勢家避匿糧差
悉查覈歸正無敢怙終者大理卿夏時正居家
挾老姦持上下官短長彊占孤山三賢堂并祀
田民田力奪還官給主夏銜之誣奏勘官朱守
孚不察其為清白吏望厚賂欲妄加叅論人心
不平有二三義民潛欲出金賂之公聞之曰吾
本為利民而今反不利不可竟被叅奏落職都
御史楊繼宗上章論救不報闔郡吏民冤號攀
戀不忍其去貧居二十年杜門不出一介不取
予一刺不入公門會

赦復官病卒年六十八卒之日室如縣磬親交
治其喪事三十年後太僕卿仁和邵銳言於浙
省巡察祀於名宦祠過淮言於撫鎮應祀鄉賢
祠而時已祀矣可見天下之公也行太僕少卿
顧達撰墓誌

戶部尚書贈太子太保葉公洪

葉公洪字本清其先金華人宋宰相衡之後曾
祖顥以詩鳴有樵雲猷唱集傳於世祖士廉洪
武初戍淮遂為淮安衛人公長身脩髯見者知
為偉器景泰間登進士第拜監察御史天順間

坐累

景帝時有同姓名御史議加南城天順復辟其人巳外補公誤承面鞠極慘內廷知其枉帝悟速公知武陟縣改清江寶坻皆有惠其人誅之黜公

政成化初用薦超陞廣西按察司僉事南丹土

官侵掠臨邑躬為撫定城柳城洛容以遏流賊

蓄永通粟以濟饑民賊據南寧奉勅督捕擒

其首惡攻荔浦率兵勦平之俘一幼兒七歲

詔賜綺帛後監軍者道遺一俘婦詢之即兒母

也乃以配園丁改山東遷陝西副使領岷州兵

備松潘賊久為邊患撫綏乃定又會兵勦洮州

賊斬首甚衆擢河南按察使拜都察院左僉都

御史巡撫山西兼督鴈門諸關歲屢歉發廩賑

卹全活者衆垣曲流民嘯聚至數千督有司撫

之亂竟不作調大同兼贊理軍務請設井坪千

戶所又增築諸堡城加徵草數罷土兵戍邊之

不便者

孝宗即祚召為戶部右侍郎轉左侍郎進尚書

加太子少保有姦民獻大名川地為皇莊

貴臣主之牢不可解力排群議卒歸於官哈密

為土魯番所陷守臣請暫給廩食處之內地公

曰是自貽患也遂弗給中帑告乏議折鈔錢清

第

第

第

船料起存積及王府田租從有司徵納以省
侵擾其額外陳乞者後先相繼多據理止之間
以疾告
上命醫診視遣中官禮問於家疾再作具疏乞
休

詔許給驛歸鄉卒年七十六

朝廷遣官諭祭命有司營葬如制特贈為
太子太保蓋異數云公亮直無偽言論灑然每
事持大體不務瑣屑初仕連蹇自為縣以至臬
司回翔二十年以內憲領鎮又數年久在外服

皆稱事與職入陟曹管及為尚書愈自奮厲中
有燥執不奪權執章奏剴切皆憂民愛國語誠
一代之良臣也雖幾先歛退未竟厥施而其所
自見豈不偉哉文淵閣大學士長沙李東陽撰
墓誌從子贇

贇字崇禮天順甲申進士歷刑部主事員外郎
嘉興府知府再知台州廣信公少體弱氣清不
能誦習默識之而已當官外蘇而內嚴庶獄緣
情定濫人不敢干以私迭遭母喪歷守三大郡
孜孜盡職不拂情以招怨不立異以邀名所至

無赫赫聲每有去思歷陞江西布政司叅政左
右布政都察院右副都御史總督南京糧儲進
工刑二部侍郎宦情政體不改其舊操履堅定
貧約終身自入官以至歸隱四十餘年出入供
費皆出於其弟寶可謂難也已居鄉世味澹然
近則徒行遠則買舟或干以官府事則搖手不
欲聞有前輩之風焉

福建按察司副使韋公斌

韋公斌字彥質號行素淮安大河衛人少穎拔
瞻於文辭成化戊子中南畿鄉試戊戌登進士

已亥選授戶科給事中封駁論奏補遺拾遺
批逆鱗遭廷辱不懈於位嘗曰假彈劾以快
私讎擬細緩以賣公道吾所深耻丁未春同考
禮闈有取當軸子孫以媚竈者公力持之不可
當軸者銜之尋處公以廣東提學僉事鼓率生
徒恢張風化治心以培其本養氣以達其枝明
經析理通其窒塞含英吐華藻其枯淡杜梯媒
路開公道門優劣次第錙銖不爽政聲徹京師
弘治癸丑陞福建副使仍督學政奉新例沙汰
學校生員目短視不能辯堂下左右奸人因而

行詐事覺公曰人將謂我耄而私也遂白諸部使者投劾而回未幾卒年六十五有詩文數卷藏於家養浩居士顧達撰墓誌

漕運參將錦衣衛都指揮周公瓚

周公瓚字朝獻先世江都人高祖鏞以元平章鎮撫吳元年歸附授西安衛百戶曾祖玉累戰功陞大河衛指揮僉事祖鑾伯景繼襲公為景後得襲初委造軍器弊剔器良稱幹濟才三年總木衛糧運時船少軍困負運累萬嚴鉤考節浮費禁侵漁宿貸一清士有餘積成化乙巳山

陝河南三省饑奉兩府檄部粟十萬往賑沂河西上經歷百險卒無稽程當時賴之總漕都御史薦其端謹公勤熟知漕務命把總管領淮安等八衛運糧未幾進署都指揮僉事遇

恩詔實授公統馭有濶撫綏有恩士不告勞嘗患疽危甚部下有請禱願以身代者其得士心如此會參漕協守缺員廷議合薦

上曰可遂以都指揮克漕運參將兼守淮安援例改錦衣衛帶俸感一時知遇事有當為力勤不怠有當言從容贊翼外示恂恂而中懷蹇蹇

舊各總歲運多掛欠恒稱貸奉要輒倍其息而
運官因以爲利公防檢嚴籌畫精糧無掛欠官
有餘羨二三年積至數萬前此未嘗有也公有
心計因而積勞嘔血上疏乞骸骨少保尚書馬
公留之甚力

詔果不允且加勗焉明年又力疾備運江南再
疏行勘而疾日增劇總督張都御史冀其起而
緩其奏遂卒於官年五十七公天性仁孝恭儉
好禮愛人室無姬妾事伯母太淑人尤謹既喪
哭盡哀至負土封墓君子善其知所報撫遇士

卒有恩嘗市善藥療其病死則歛而歸之尤務
掩人過使知自改一時莫不以爲長者蓋武臣
之翹楚也吳郡楊循吉誌其墓子正

正字元貞別號與石少喜讀書負大志選克郡
學弟子員應文舉未就以廕襲大河衛指揮僉
事卓立矯厲既專衛政則先聲奪人疇昔賄驕
訟矜者皆斂縮惠窮卹困部中長老嘖嘖歎賞
督撫都御史李蕙表薦濶洋運糧把總不少貶
損以徇倉曹倉曹趙郎中媒藥致穽罷歸安時
養晦無所怨尤客至則與劇談神仙星氣五行

媿媿多辨博若事關國紀民隱則又凝情動色
都御史陶琰督漕廉公無罪未復遮洋之任條
上便益數事至今行之會河北山東劇盜起遮
絕運道時都御史張縉在漕府以謀勇奏領兵
事時漕舟千艘阻於白洋河出奇制勝賊不得
逞會官兵大集賊逸而南奔悉衆追襲擒斬五
十餘功申解總制軍門爲左右掩蔽不見錄事
平漕府辯於

朝進階三品官指揮同知

勅守備歸德兼管武平等處以都指揮體統行

事至則簡什伍時教閱會諸生談經講藝有古
儒將之風焉居九月忽不樂輒引疾東歸買田
漣水之陽結廬躬稼寓情墳典五經三式及諸
外家之說靡不歷覽詳說所著有皇極經緯六
壬祕并集古竒方諸書藏於巾笥未行後陶公
再鎮淮以漕運叅將薦不果尋復起爲湖廣運
糧把總累疏辭免江西寧藩稱亂留科復以將
材薦終不起刑家孝友與人尤篤信誼父病疽
嘗口吮毒液弟夕瘵與同卧起夜授溺器遼左
張都御史文錦死大同之難奴獻計欲分其所

寓篋金怒叱之俟其妻子歸完壁焉父貧時有所稱貸主者多物故乃召其子孫授之力田所入歲與鄉井通有無海濱彊獷得所露丐者皆欲盡死力性輕財好施予苟赴所急則倒囊傾困愛客喜過從雖吐茵罵座亦不之厭又善獎寒雋常折行輩納交尤克念貧賤之交每顧郵師友妻子惟好惡太明一言以立然諾至死不變嗟乎勲業不著旂常材猷徒膏耒耜命也可謂金玉君子者與卒年六十有七戶部侍郎潼陽胡璉誌其墓

山東按察使石公渠

石公渠字翰卿別號天全道人世為泰州人祖希永高邑令改掌山陽縣學教遂占籍清河縣卜居淮之清江浦公穎敏超卓剛毅老成舉成化乙酉南畿鄉試登丙戌進士擢刑部主事遷員外郎平允守灋陞山東按察司僉事分巡遼海東寧道兼管糧儲遼陽倉糧腐爛者半首按究官吏奏黜為民州衛貪婪者聞風落膽有改行自新者即加獎藉以勸其進人皆感服在遼陽數年撫郵官軍禁革奸弊邊境賴以安謐擢

本司副使改巡他道一日郊行遙見人影出沒
林木中近復不見命部卒搜叢林中得頂包僧
十餘人解其包有銀物在焉鞫問之昨宿尼寺
殺商人而奪其貨驗尸賊皆伏辜奏毀其寺尼
配諸鰥夫癸卯山東大饑奉巡撫牟都御史檄
齎銀五萬兩糴穀江南太平府渡揚子江風浪
大作舟幾覆人皆號泣公默神色不變焚香祝
曰此行爲救數百萬民命渠何足惜神其鑒之
言未既風浪頓息載穀而歸上下胥慶分賑饑
民賴以全活未幾陞本司按察使審核重囚日

不平反察舉貪廉憲體貞肅雖老吏進呈文案
惴惴焉莫敢仰視黜姦獨舞文者數輩令行禁
止丁未會朝

觀考察主其事者頗有宿憾必欲置之散地先
期有聞遂拂衣而歸置萬柳莊奉二親正德丙
寅

恩詔進階一級病卒年七十一行太僕少卿顧
達撰墓誌

河陰令張公素

張公素字玄卿別號檜泉其先爲吳人父景儀

嗜詩書工楷篆豪邁特達僑居京師三楊學士
欲薦授中書辭挈家南徙占籍淮之山陽寓居
清江浦公年總角志趣不羣性資穎敏通五經
大義尤長於書旁通陰陽醫卜之說雖專門者
所不及貧遭父母喪力所得為一準於禮領成
化乙酉鄉薦為太學生以天下士自期大司成
王公見其所為文器重之五上春官不利謁選
授河陰令初到官適歲大侵餓殍載途又承凋
弊之餘百蠹孔棘憂形於色亟求拯揀之方曰
是不可以他求也為之在我由是簡訟獄罷追

節厨傳平市價禁和買停權稅裁靡文息
風征徭之缺且亟者不可已者勸民以次而辦
其可已者已之得用一緩二之道與民休息民
賴以安歲餘病者興困者蘇民津津若有生氣
由是士教以學農教以畊翁然大治庭無敲朴
之煩齋有垂簾之靜隸卒倚其杖於壁兩兩立
左右結絲網資用有太古之風焉要之皆推誠
心本直道無一毫作偽以罔民之意至於勵清
操甘苦節不改儒素尤人所難者邑有廣武山
政暇邀一二邑博登山酌咏此又俗吏所不暇

及者上司聞而嘆賞將薦之於
朝翻然嘆曰化行一邑吾道可槩見矣何必天
下哉因和陶靖節歸去來辭以見志遂連章乞
休踰年得請即日戒行囊篋蕭然如逆旅中人
上司益賢而嘉之給舟遣賚以行百姓依依如
失慈母礮石丐大司徒漳河石玠撰遺愛碑以
繫去思歸卧林下三十年踪跡未嘗入城府田
園廬舍不改其舊若未嘗爲宦然日以文墨自
娛有檜泉集叙姓千文和續咏史詩咏物詩各
數卷藏於家冲淡典雅有陶靖節之風卒年

十有九戶部主事新安葉天球誌其墓子雍
雍字堯化號淮川弘治間以壁經發策南畿未
就逮正德年復以經明行修徵逮補尋乞終養
又弗就踰十年厥考檜泉養終焉定跡深棲終
老弗起鄉人賢之稱曰淮川先生卒年八十有
一菁華塵埃芳馨草野不其惜乎工部主事武
林邵經濟誌其墓

陝西行太僕寺少卿顧公達

顧公達字存道號貫初子晚號養浩居士先世
居蘇州崇明西沙

國初曾祖行十從戎隸大河衛十歲通韻學精
算數二十為府學生提學御史戴珊方以識操
取士甚器重之成化甲午舉於鄉戊戌登進士
第授宜陽知縣乙巳春以徵至京被簡將入中
臺會有沮之者不果丙午陞兵部武選主事弘
治辛亥遷車駕員外郎癸丑當進郎中同官有
力者欲得之因出公為陝西行太僕寺少卿在
宜陽一意惠養遇事可否不以利害為前却先
是郡守檄縣月歛甲首直錢十餘萬縣丞希守
意為自殖地公初到官詢知民瘼乃絕口不

直錢守入丞譖銜之既乃知無他意加稱獎夏
旱禱於龍母洞得雨又旱躬勸富民出粟以賑
饑者多至三萬餘石期以歲豐溢其數償焉給
未盡已報秋成矣人皆頌公拯民之惠格天之
誠事載去思碑中銀礦洞在萬山中有孫叅政
者懼貽民患封之又請於
朝設官以守孫後為都御史秉中官意有異議
公曰公為叅政則封之為都憲則開之何也孫
盛怒欲辱之以衆請抹不得施中官欲起礦課
乃力爭曰礦非宜陽所賦有而宜陽賦受其害

若復起歲課有死而已不敢承命中官不能屈
事得寢決獄有不可者則以理折之未嘗輕用
刑威民服誠款徃徃樂輸其情虞學政久弛仕
進路塞暇日則進諸生講經義且亟加厚賞以
風厲之尋有舉於鄉者自是科第不乏人在兵
部守灋惟謹有武官子因幼假職從兄久不得
歸年五十始謁部選同官難之其族遂誣為異
姓賴公核實領選以去郎中徐仲山歎其用心
之密奉命冊封代府潞城王贈物甚厚悉
還之故王贈行有辭金楊震堪為相之句在

太僕奉

勃視事不遺餘力所督榆林西寧洮岷諸處稱
險阨番夷出沒不常必親歷其地又考牧一出
於公事外畧無所擾沿邊諸節鎮皆歎息以為
不可及且冀其當大用而乃以疾上疏乞歸不
可留矣公為人外和內劄不喜華飾性孝友病
祿養不逮其親每獸坐則泫然淚下舉宗族之
不能葬者四喪為古文宏博明健不拘繩檢詩
祖盛唐諸人而陶寫已意為多卒年八十有五
翰林院編修同郡蔡昂誌其墓而序之曰徃歲

觀風諸公疏貫初翁清節於
朝請加優禮示風厲事下吏部不報未嘗不憚
然以歎也嗟乎士大夫國家之元氣也所以養
是元氣在國家而亦繫所自養觀公之所自養
則厚矣彼當國者歎無風厲之責歟而乃若是
何也雖然公所自得亦已多矣

文獻志卷七

